

Pauro Timoteo bo tapara ziwatahaka

Timoteo Pauro tuk zinymyrykyta, iwaze Pauro Timoteo zerikikze papeu ibo ziwatahaka. Hawa Sesus tuktsa nisipokzitsiki iwatahi ispirikpowy ibo ziwatahaka. Deus hyrikoso Pauro ziapewywy iwaze katsa kino niwatihi ana humo hi tanymyryky.

¹ Uta Pauro. Timoteo abo piwatahaka. Kiristu Sesus zikykhohik. Sesus Kiristu Deus tazo bo mymyoktyhyrykta niwatihi zikpehahiknaha iwatahu iakhohota my. Sihumo Deus wasania ty mopamykysoko. Katsa Sesus humo myspihikrētsa. ² Ikiakta katse wata. Iki katuk Sesus humo aspirikporēta. Deus pe my:

— O Deus kazo Timoteo humo tyzipokzitsikita iwatahi kytsa nasipokzitsi. O kazo Kiristu Sesus mypehatsa humo niwatihi ahahumo tsakurēta mykara — my.

Kytsa asahi tahaspirikpowy baratyty mynakananaha asa bo hi — niwazuba pyktaha — tsimy.

³ Iki Epeso eze tsimytare. Nezeba Masedonia bo niukuruze ape:

— Iki Epeso eze tsimytare tsihikik iki. Abaka atsatu mykara Epeso tsimytare iwatahi asaktsa nisihrinymyrykynahatsa asahi mybarapetu nikaranaha tysipehahik. Amy baratyty mysihrinymyrykynaha. Deus harere batu mysihrinymyrykynaha tahaharere ty zuba kytsa bo mysihrinymyrykynaha. Iwatahi iki tysipehahik ispe tsimy:

“O meky watu tsimysihyrinymyrykynaha. Niwazuba pyktaha! Ahahyrinymyry byiziky tsimy. ⁴ Ahazotsa

niakbakaranahatsa soho ty ka soso byitaha. Amy sinaro nikananaha ana soho ty ka soso byitaha. Anatyhi tsimypamykysokonaha zeka kytsa Deus harere bo hỹ ahabyitsa. Tsimyhapepehakanaha zuba. Deus mybo tsimysapyrëta ja mykaranaha, iwa motsasokonaha. Iwahatu ahazotsa harere ty ka soso byitaha” tsimy – my.

Iwa sibo tsimytsasoko. ⁵ Iwa sibo tytsaso iwatsahi simypokzitsirëtsa mynakananaha. Simysapybyitsa soho humo batu mytsaty mykaranaha zeka simypokzitsirëtsa mykaranaha. Sesus humo mospirikpotohinaha zeka, kytsa humo simypokzitsiukrëtsa mynakananaha. Deus harere bo hỹ mykaranaha zeka iwaze kytsa humo simypokzitsirëtsa. ⁶ Kytsa ahatukze kaharere humo batu siakparawy. Asahi batu wasani zikaha. Kytsa mekta ske buruk tu myzaranahaze tsa watsa moziknaha. Myzaranahatsa tihi:

– Hãta sa iske – maha, tsawatsa kytsa Deus soho mopamykysokonaha zuba. Hawa mospirikpo maha. Asahi saksoho humo piwabynaha zuba ana humo hi siakparawy. ⁷ Asa kino kytsa mysihyrinymyry tsihikiknaha. Mahani. Moises harere ty mysihyrinymyrykynaha batu zikaha. Amy ty motsasokonaha ana humo hi batu sihyrinymyry. Batu wabyziuhu zikaha iwatsahi batu sihyrinymyry. Motsasokonahaze:

– Katsaktsa myhyrinymyrëtsa – asaktsa mybarapetu mykaranaha, iwatsahi waby byitaha.

⁸ Deus harere ana hi Moises ziwatahaka tisapyrëna my. Ana humo hi myhyrinymyrëtsa. Ana humo kino mytsaty tsimaha zeka wasani tsimaha. Ana humo hi hỹ tsimaha zeka wasani tsimaha. ⁹ Iwahatu Deus harere ty Moises pe niy. Astatu Moises iharere ziwatahaka. Kytsa simysapybyitsa mykaranaha asa bo hi ziwatahaka. Kytsa batu simysapy asa bo hi ziwatahaka. Kytsa batu

wasani mykaranaha asa bo hi ziwatahaka. Taparaka Deus harere ty sibo nyny niy. Kytsa iharere humo batu siakparawy. Kytsa mypehatsa harere bo batu yhỹ niaha. Kytsa Deus humo batu sispirikpo, asaktsa simysapyby-itsa nikaranaha. Asahi tahazotsa nasibakanaha, ustsya kytsa kino niwatihi nasibakanaha iwatahi sibo ziwatahaka. Taparaka Moises Deus harere ziwatahaka.

¹⁰ Kytsa ustsya okeza nasihuahuakanaha, wytykyryk kino niwatihi asizahi tahawaktykyryk pytsa batu iktsa zuba zikaha. Kytsa naharapewowokonaha. Asahi jaby-itsa nasiaksekenaha. Kytsa okyrysaro yksetsitsa sityshyryboarētsa maha. Simyspihikbatanikitsa. Siharere-wabymybarētsa bo imysapybyitsa mykaranaha iwa asa kino zuba Deus harere ziwatahaka, ana humo hi hỹ maha zeka tahamysapybyi pimoewynaha. ¹¹ Deus kape niy:

— Wasania ty tytsasokta! niy. Nanabyitaba kaharere tytsaso niy. Anaharere zuba motsasoko. Ana pe wasani ty my. Deus imysapyrēnikita, ata zuba wasani mykara — niy.

Hawa Deus Pauro zipokzitsiki.

¹² Kiristu Sesus mypehatsa kape niy:

— O ikia zawatawy iwaze tsimysapyrēta tsimozik. Iwaze nanabyitaba kasoho wasani tsimysasoko iwa kasyhyryze tarabajatykta tsipiktsumuēhī — niy.

Kyze Sesus tazikwy ty kabo nyny niy iwahatu isoho wasani motsasoko. Atahi kahumo tsimypokzitsiukrēta iwatahi kakurēta. ¹³ Taparaka ihumo batu kakparawy. Sesus tuktsa ziknasisukyryky, Sesus kino batu kakparawy. Deus batu kanyhy. Kaspirikpobyita hi batu kahyrinymyry. Atahi iwatahu mozikpokzitsiki. ¹⁴ Iwaze mypehatsa uta kahumo tsimypokzitsiarēta. Ihumo kaspirikporēta ikyzik. Abaka ustsya kytsa humo kamy-pokzitsiarēta ana humo hi zikyrinymyryky. Kiristu Sesus

tuk tsinapykyryknahaze iwa tsimyzurukunaha. ¹⁵ Katsa hi:

— Sesus Kiristu mybarawy bo inasik. Kytsa simysapybyri humo izumu. Zumuze kytsa asahi tahamysapybyri pimoewynahaze asa kino Deus bo mysioktyhyryk nikara — iwa tsimytsasokonaha. Wasi my. Utakta kamysapybyita tu ikykara Deus Sesus humo zikyokzohik niy.

¹⁶ Sesus Kiristu kahumo tsimypokzitsiarëta. Mahani ziksininitsihikik. Iwatahi kahumo batu iakyri. Uta ihumo kaspirikporëta ana humo hi zikperyky. Zikperyky zeka ustsá bo niwatihi mysiperyky. Utakta kamysapybyita ikykara kahumo ziperyky iwaze ustsá bo niwatihi taperyky. Deus ustsá pe:

— Pauro imysapybyita ziknakara. Utakta batu pimiywy kasopyk. Iwatahi mozipokzitsiki — niy. Aba kytsa Sesus humo batu sispirikpo kahumo Deus harere bo hÿÿ maha. Hawa Deus kahumo isopyk asahi Sesus humo sispirikporëtsa hÿÿ. Deus tuk mynapykyryknaha niwatihi. Mytuk ibaze mynapykyryknaha.

¹⁷ Iwaze Deus bo tsimypamykysokonahaktsa!

— O Deus ikia zuba tsamysapyrëta hÿÿ. Aharere pykyhytuty tsiwabyziunaha. Tubabatu ikia taparaktsa pehatsa tsiky. Abaka katsa mypehatsa tsimozik. Mytsekokatsa pehatsa tsimozik niwatihi. Ikia zuba awahi koikny baktatu. Katsa abo ba zikozonaha. Ikia zuba awahi tsimynapykyryk batu aty tohi awata. Iwatsahi katsa abo ikia zuba abazubata tsimy, bijoikpe eze mybarawy eze kino niwatihi abazubata tsimy, ikia zuba wasani tsimykara — tsimaha.

Iwa tsimypamykysokonaha.

¹⁸ Iwaze Timoteo ikia katse wata. Iwatahi pahyrinomyry. Tubabatu Deus sohokotsitsa abo nitsasokonaha, siharere bo hi mytsatzotyкта! Siharere

bo mytsatyziu tsimy zeka Sesus humo tarabajaziu tsimykara. Kytsa aharere humo tahamysapybyri pimoewykynaha. Iwahatu ikia sodadu wata ikia hi amy ty isapybara tsipimoewyky. Hawa sodadu sisukyrytsitsa bo niwatsorokonaha ikia isapybara humo batu yhỹ tsimykara.

¹⁹ Deus harere bo hỹ tsimykara. Batu pyk ziky. Amy ty wasani my tsihyrinymyrēta. Atsatu tsimykara. Utsa kytsa usa wasaniha humo batu sihyrinymyry. Iwatsahi wasani ha humo batu yhỹ zikaha. Asahi Sesus humo batu sispirikpo. Tsaraha pihik bo moharazuk ezekta hyritywata. Sesus humo sispirikpobyitsa tu iwatsahi iharere humo batu ma zikaha. Hawa tsaraha niharazuk asahi Sesus humo sispirikpobyitsa ziknakaranaha.

²⁰ Situk tu makutsa petoktsa maha. Estuba Himeneu inarokota usta Aresādere inarokota. Iwaze ispe iky:

— Ikiatsa Satanas harere bo yhỹ tsimykaranaha. Atahi za ahapehatsa mozik — iky. Iwa nitsasoko. Deus soho zisapybyrikinaha, kaharere humo mopyk tsihiknaha iwatahi iksibetsakak. Deus soho humo batu zikaha iwatahi iksibetsakak tozeka ja aibani Sesus humo mospirikpozonaha iwa mytsaty iky.

2

Hawa Deus bo tsimpamykysokonaha ana soho hi piwatahaka.

¹ Tapara ahape my:

— Deus bo typamykysonahaktsa! Myzubaha tsihyryze Deus bo typamykysonahaktsa.

“O Deus tysitsumuēhikī tsimaha. O myzo sihumo tsimpokzitsiarēta tsimaha. Iki zuba wasani tsimykara” tsimykaranaha — iky.

Iwa ibo tsimypamykysonaha. Kytsa tsyhyryze Deus bo tyzapykykynahaktsa! Amy tisapyrëna anahi istsyhyryze tsimyzapykykynaha.

² Mypehatsitsa tsyhyryze Deus bo typamykysonahaktsa. Sihudikhudikwy pehakatsitsa tsizubarëna tsyhyryze Deus bo typamykysonahaktsa. Iwa hi:

— O Deus mypehatsa myhumo simypokzitsiukrëtsa hỹ. Iwatsahi mykurëtsa tsimaha. Ba zikahapebetsaknaha kyzekta tsimykaranaha. Katsa mykurëtsa zuba tsimoziknaha. Deus harere bo zuba hyỹ tsimykaranaha iwaze wasani tsimykaranaha — tsimaha. ³ Katsa tsimyyharape pokzitsikinaha zeka Deus tsakurëta. Deus mymyoktyrykta my takino myhumo tsakurëta. Utsa kytsa kino niwatihi myharape pokzitsikinahaze tsakurëta hỹ. ⁴ Myzubaha Deus humo sispirikporëtsa moziknaha ana hi mozihikik. Iharere wasani my kytsa iharere piwaby-naha anahi mozihikik. Iharere bo hyỹ maha zeka sinini ykarawy bo ba zikmypeha. Iwahatu myzubaha iharere bo hyỹ maha mozihikik.

⁵ Iwatahi Deus babata ikaha tahi zuba. Kytsa simysapybyritsa humo takyriki. Iwaze Sesus Kiristu mytsapuhyripyrywyta mybarawy bo inasikze maku niyzik. Nihyrikosokda kytsa zibezenaha. Nihyrikosokdaze kytsa simysapybyitsa nikaranaha iwatsatu nisiokzo. Atahi mysapyzekeny nihyrikosokda ata zuba myhumo. ⁶ Iwatahi Sesus humo Deus ba ziktakyri. Iwa Sesus humo Deus kytsa ty batu ziktakyriwy. Deus wasaniha nitsaso tsihikikze Sesus nihyrikosokda naha soho nitsasoko. Sesus nihyrikosokda ana humo hi kytsa sihyrinomyrëtsa. Deus bo mysioktyhyryk hỹ ana humo kino sihyrinomyrëtsa. ⁷ Deus zikpeha kakzohota mozik. Iharere motsasoko ana humo hi zikwatawy. Kytsa Sudeutsabyitsa mysihyrynomyryky

sibo zikykhohik. Wasi my. Kamyspihikbatabyita mykara. Ata hi:

— “Ikiahatsa Sesus humo ahaspirikporētsa tsimozik-naha” ispe tsimy iwa kape niy: “Iharere bo hyĩ tahaktsa kytsa” ispe tsimy: “Iwa kape” — niy. Iwa.

⁸ Iwaze abo motsasoko. Kytsa hudikhudikwy eze tu Deus bo typamykysonahaktsa. Izumubanhaze Deus bo mopamykysokonaha. Simysapyrētsa tahatsipatsa ty jobo bazuzu sisopyk iwa Deus bo mopamykysokonaha. Sibet-sakokbyitsa Deus bo mopamykysokonaha. Siakyriukbyitsa kino niwatihi mopamykysokonaha. Izumubanhaze Deus bo mopamykysokonaha.

Wytykyryk Sesus humo sispirikporēza.

⁹ Wytykyryk kino niwatihi. Sesus humo sispirikporēza. Tahasuk ty korobyk mahaze sisapyrēza moziknaha. Sisuk wasani my zeka kytsa batu sibo iktsaziu zikaha. Siharadi meky watu batu mykaranaha iwatsahi kytsa sibo batu iktsaziu zikaha. Sinaha tisapyrēna. Sisuk tsipokzitsarēna ty batu korobyk zikaha. Sisuk tsiziurēna korobyk maha. Iwatsahi kytsa sihumo batu iktsaziu zikaha. Wytykyryk tahasuk soho bo batu mytsaty zikaha. Hawa sizubarētsa mysipokzitsinaha mytsaty maha. Ana bo hi mytsaty maha. ¹⁰ Wytykyryk motsasokonaha:

— O katsa za Sesus humo mospirikpoza tsimaha — maha. Asizahi pipokzitsikinaha zeka kytsa sisoho:

— O siza hi simysapyrēza hỹ — maha.

¹¹ Sesus tuktsa izumubanhaze wytykyryk tahabyri mopykyryknaha. Ahatuk ka soso byitaha:

— O katsaza myhyrinomybyiza iwazahi waby zuba — mykaranaha. Iwa soso byitaha. Asiza mypehatsa harere pinymyryknaha. ¹² Kytsa bo amy batu imysapybara ty ka isty spirikpo spirikpo byitaha! my. Iwa wytykyryk pe

my. Asiza kytsa ba ziksipehanaha. Asiza pe my — Ikihaka ahabyri ahakso byitaha — my.

¹³ Iwa asiza bo motsasoko. Tapara Deus Adão nizukni. Iwaze Ewa nizukni. ¹⁴ Hyrikoso sapybara pehatsa Satanas inarokota Adão bo mybarapetu niy. Wytyk zuba iharere humo yhỹ niy. Barapetu niyze atatsa iharere humo yhỹ niy. Atatsa hi tapara Deus harere bo batu ma niy. ¹⁵ Iwazahi simyitsapyrẽza. Ibykyhy mopurukze ky tsapyriwa. Siza Sesus humo mospirikponaha zeka tahahyrytsa tuk sakurẽza moziknaha. Utsa humo mysipokzitsikinaha zeka sakurẽza moziknaha. Tahasuk ty korobyk maha zeka tisapyrẽna mozurukunaha Deus asiza mysioktyhyryk. Tahamysapybyri pimoewynaha zeka Deus mysiokzo. Iwa hỹ.

3

Sesus tuktsa sispirikpokonahatsitsa soho motsasoko.

¹ Myspirikpowyhani baba wabytoktotaha! — Aty Sesus tuktsa pehakatsa zispirikpokota mozihikik zeka wasani my — my.

² Iwaze atakta bazimyi. Wasani mozuruku. Iwa zeka atakta estuba zubatatsa piakse. Batu paikpa mytsaty ziky. Utsa harere piwabyziu. Kytsa iwahoro bo pomonahaze:

— O kawahoro bo pakutyny. Awanu tyhãity — my. Mypehakatsa Deus harere ty kytsa mysihyrinymyryziuku.

³ Kytsa opuwy tsõsĩ ba ziku. Kytsa ba ziksike. Ba ziktasakpare. Atahi kytsa humo tsimypokzitsiukrẽta. Utsa kytsa okyrysaro ba ziaксе. ⁴ Namyspirikpokotsa tahahyrytsa mysipokzitsiki. Tahyrytsa iharere bo ma mykaranaha. Tahyrytsa simysapyrẽtsa maha. ⁵ Tahyrytsa humo imypokzitsi byizeka iwaze Sesus tuktsa humo kino

niwatihi batu imypokzitsiuk. Tahyrytsa humo imypokz-itsi byizeka Sesus tuktsa mozumubanhaze ba ziksipokz-itsi batu ziky.

⁶ Maku Sesus humo abaka iharere bo yhỹ mykara batu myspirikpokotsa zikyzik. Ata kino mypehakatsa Sesus tuktsa tuk batu ziwatawy. Mypehakatsa Sesus tuktsa tuk tsiwatawy zeka batu imysapy my. Atahi mytsaty mykara:

— O uta mypehakatsa my. Kytsa kaharere ty mysipirikpo uta zuba wasani my zeka — my. Iwa mytsaty mykara. Tubabatu hyrikoso sapybara pehatsa Satanas inarokota atsatu mytsaty nikara.

— O uta zuba wasani my — nikara. Iwatahi Deus ipe niy:

— Batu ba. Ikia batu amysapy — niy. Iwaze Sesus humo isipirikpoziubyita mozik zeka Satanas wata mozik. Deus tihi — Ikia batu amysapy tsimy — niy.

⁷ Maku Sesus tuktsa namyspirikpota mozik zeka kytsa sizubarẽtsa isoho humo piziukunaha. Asahi Sesus humo batu sispirikpo mykaranaha:

— O atahi tsimysapyrẽta iharere tsiwabykynaha — maha. Kytsa sizubarẽtsa iharere humo siakparawy byizeka tisukatsihikrẽta mozik. Tisukatsihikrẽta zeka jocarahrẽta hyrity wata. Irara tawerykywy bo mynatsukze ba zikzoihik iakubyri mozumuze ta wata kytsa sizubarẽtsa sispirikponahatsa soho zisapybyrikinahaze siakubyri mozumu niwatihi. Satanas werekywy hyrity wata bo mynatsuk. Iwatahi kytsa isoho tihi:

— O atahi tsimysapyrẽta. Wasani my — maha. Iwaze isukatsihikbyita mozik.

Sesus tuktsa tsumuẽhĩtsitsa soho motsasoko.

⁸ Abaka Sesus tuktsa tsumuëhĩtsitsa soho piwatahaka. Asahi sitsumuëhĩtsitsa namyspirikpokotsa watsa mozurukunaha. Kytsa sisoho:

— O asaktsa simysapyrëtsa — maha. Sitsumuëhĩtsitsa harere wasani mykaranaha. Ba zik mospihikbatanaha. Kytsa opuwy tsõsĩ ba ziku. Utsa kytsa namy ba zikzihiknaha. Okyrysaro ba zikzihitsa naha. ⁹ Taparaka kytsa Deus harere humo ka batu sihyrinomyry. Abaka sihyrinomyrëtsa. Deus sibo taharere nitsasoziuku, sitsumuëhĩtsitsa harere humo sispirikporëtsa. Iwatsahi wasani mykaranaha mospirikpokonaha.

¹⁰ Tsikzumubanhaze sitsumuëhĩtsitsa soho humo tsimypamykysokonaha. Ikiahatsa hi:

— O atahi wasani mozuruku ja tsimysapyrëta ja — tsimaha. Iwa tsimypamykysokonaha. Kytsa isoho humo yhỹ maha zeka tsimysapyrëta hỹ. Iwaze sitsumuëhĩtsa mozik.

¹¹ Sitsumuëhĩtsitsa okeza kino niwatihi simysapyrëza maha. Ba zikaha pisohonaha. Ba zikaha pimijjanaha. Batu paikpa mytsaty zikykaranaha. Wasani mykaranaha. Wasape ha zuba motsasokonaha. ¹² Sitsumuëhĩtsitsa tasukza zeka wasani maha. Estuba zuba tatsa piakse, iokeza petokuruk zeka batu imysapy my. Maku petok okeza zeka ba ziwatawynaha. Sitsumuëhĩtsitsa hyrytsa siharere bo yhỹ mykaranaha. Iwahoro ezektsa sisopyk wasani mykara. ¹³ Sesus tuktsa nasitsumuëhĩkĩnaha zeka kytsa sisopyk tisapyrëna maha. Deus wasania ty utsa kytsa bo motsasokonaha. Batu sisikpyby. Sisikpybybyitsa Deus wasania ty Sesus soho motsasokonaha.

Taparaka batu myhyrinomyry abaka myhyrinomyrëtsa.

¹⁴ Aba Timoteo abo piwatahaka. Iwaze zuba abo mynakozore tsihikik. ¹⁵ Hawa my zeka aibani zuba abo mynakozore iwatahi papeu abo piwatahaka. Anapapeu

humo iwatahaha tsipinyze hawa tsimyzuruku ana humo hi ahahyrinymyrëtsa tsimoziknaha. Deus tyryktsa mozumabanahaze Deus wahoro hyrity wata maha. Wahoro harakurukwy wata tyrikto niy ba ziknatsihyrikpetok. Iwa Deus tyryktsa iharere bo hyÿ mykaranaha iharakurukwy watsa sipunihikrëtsa moziknaha. Deus harere bo hyÿ mykaranahaze ituk tahawahi mynapykyryknaha. Batu simiyiwy sipunihikrëtsa moziknaha.

¹⁶ Kytsa Sesus humo batu sispirikpo. Hawa kaksaktsa Sesus humo myspirikporëtsa ana humo hi batu sihyrinymyry. Sihyrinymyrybyitsa tu Deus wasaniha ahabara ty sihumo tsihokdaharëna. Abaka batu. Abaka katsa myhyrinymyrëtsa. Abaka Sesus Kiristu sibo motsasoko. Sesus maku wata niyzik. Deus hyrikoso isoho hi: — O ikia wasani my. Ikie zuba tsamysapyrëta — my.

Atakta bjoikpe iknyktsitsa Deus tsumuëhëtsitsa ibo iktsa nikaranaha.

Sesus tuktsa ustsä bo mopamykysokonaha, kytsa nanabyitaba sizubarëtsa bo mopamykysoikiknaha.

Sizubarëtsa ihumo sispirikporëtsa niyziknaha.

Deus ity zihyrikipowyze ispitu niyzikzo

bjoikpe bo nido.

Deus tuk mynadyhyky. Iwa hÿ.

4

Simyhyrinymyryziubyikitsa.

¹ Aiba tohi kytsa hyrikoso sapybara hyritywatsa harere bo hyÿ mykaranaha. Asa soho hi ahabo motsasokonaha. Deus hyrikoso mybo botu nitsaso. Kytsa hyrikoso sapybara harere piwabykynaha, Deus hyrikoso mybo mypubara ty nipamykysoko. Iwahi:

— Bykyze wastuhu kytsa Sesus humo batu sispirikpo. Sesus zerekeknaha. Sesus soho humo nispiriktsokdanaha.

Hyríkoso sapybara humo Sesus humo nispiriktsokdanaha. Hyríkoso sapybara harere bo zuba hỹ mykaranaha. Asahi nispiphikbatakanahatsa harere humo yh̃ maha. Hyríkoso sapybara meky watu siharere ana humo hi mysihyrinymyrykynaha — niy.

² Simyspiphikbatanikitsa. Hyríkoso sapybara hyritywatsa harere bo yh̃ mykaranaha. Asahi hyríkoso sapybara situk tsahi nispiphikbatakanaha. Nisimiywykynaha. Wasani ja mykaranaha batu sihyrinymyry. Batu imysapy ja batu sihyrinymyry. Paikpa mytsaty nikaranaha. Asahi siakbatsa watsa iwatsahi batu harere zikaha. Sihyritywatsa asahi batu tahapetu sisopyk. Iwatsahi wasani ja mykara batu sihyrinymyry, siakbatsa watsa. ³ Asahi mype nikaranaha:

— O ikia asukza byizeka wasani mykaranaha: — mybarapetu sisopyk. Mydisahawy soho humo niwatihi mype maha:

— O ikiakta siraratsani ty hauk hauk byity! — mybarapetu mykaranaha. Deus hi siraratsa ty mybo nyny niy. Myzohotsa ty nyny niy. Iwatahi siraratsa sizubarëtsa myhumo wasani my. Siraratsa sizubarëtsa tsimynasiborokonaha zeka wasani my. Ikiyahatsa Sesus humo ahaspirikporëtsa iwatsahi siraratsa sizubarëtsa tsimynasiborokonaha. Ikiyahatsa hi:

— O Deus ikia tsamysapyrëta ikia zuba mydisahawy ty mybo nyny tsiky — tsimykaranaha.

Iwaze mydisahawy ty haukbaiktaha myzohotsa kino niwatihi tahaborobaiknaha. ⁴ Deus suknihi ka wasaniha zuba. Iwatsahi nanabyity tsinamydisahakanaha. Iwatsahi mydisahabyitu Deus bo tsimypamykysonaha:

— O myzo ikia hi mydisahawy ty mybo nyny tsimykara. Ikia zuba tsamysapyrëta iwatsahi mykurëtsa — tsimaha.

⁵ Deus hi:

— Nanabyi nizukni wasani my. Kytsa bo wasani my — my. Mydisahawy ty tsimymydisahakanaha zeka Deus bo tsimypamykysokonaha:

— Ikia zuba tsamysapyrëta — ipe tsimaha. Iwatsahi mekywaha tu tsimymydisahakanaha.

Sesus Kiristu tsumuëhïtsa imysapyrënikita.

⁶ — O Timoteo hawa abo motsasokonaha ikia kino mytukytsa bo tytsaso. Hawa Sesus Kiristu tsumuëhïtsa tisapyrëna mykara. Atsatu tsimytsasoko — mykara. Iwaze tu ikia Sesus Kiristu tsumuëhïtsa babata tsimozik. Botu Sesus harere tsiwaby. Ana harere wasani my. Atsatu hyÿ tsimykara. Ikia kyry tsibik wata. Atahi taopuwy pezukukze taypyk. Ikia Deus harere bo hyÿ tsimykaraze tsahyrinymyrëta tsimozik. Kyry tsibik taopuwy humo tsakurëta mozik. Deus harere niwatihi zatsumuëhïkï. Mypowy waha. Ikia Deus harere bo hyÿ tsikykara. Abaka niwatihi iharere bo hyÿ tsimykara. Iwa tsimyzuruku.

⁷ Kytsa siakbatsa harere soho ty motsasokonaha zeka waby waby byitaha. Anahi batu iakparawy my. Ana harere bo yhyÿ tsimy zeka Sesus harere humo ba hÿ ziky. Iwatahi ana humo hi batu awabyhy. Ikia hi Deus hyrikoso iaksoho bo hyÿ tsimykara. Iwatatu Sesus humo tsimyspirikpotohi.

⁸ Ahanury humo ahapaikrëtsa zeka wasani my. Tsimyz-ibytuhukutu zeka Deus harere humo hyÿ tsimykaranaha zeka wasani hÿ tsimy. Iharere bo hyÿ tsimykaranaha zeka wasani my iwa zeka tsimyzurukunaha. Bykyze tsimyk-babanaha zeka Deus tuk mywahi tsimynapykyryknaha. Ituk tsimynapykyryknaha mysputuzo tsimaha. ⁹ Anaka iharere wasani hÿ. Ana humo hi tspirikporëta hÿ. ¹⁰ Iwatsahi tarabajaze tsimykaranaha. Katsakta Sesus humo mspirikporëtsa. Sesus tawahi ispituzo atahumo kino mspirikporëtsa. Katsakta itsyhyryze tatsumuëhïkï

tsimykaranaha iwatsahi ustsá kytsa Sesus humo sispirikporëtsa. Sesus humo mysispirikpokonaha iwatsahi tahatsumuëhíkĩnaha tsimykaranaha. Deus kytsa sizubarëtsa mysioktyhyryk.

¹¹ O Timoteo ana humo kino kytsa tysihyrinymyry. Ana kino kytsa tysipehaka. ¹² Timoteo ikiakta apykyhyzytykta pykyhytuty. Ustsá kytsa asoho ty batu tyso:

— O Timoteo mykyryburukta wata iharere ty batu tywaby — maha.

Iwa abo batu tyso. Ikiá hi wasani tsimyzuruku. Kytsa Sesus humo sispirikporëtsa asahi tysipokzitsi. Ustsá kytsa kino niwatihi tysipokzitsiki. Tsimytsasoziuku. Deus humo aspirikporëta hỹ. Amysapybyi ty tsimykara zeka tsimoewyhyk. Ikiá wasani tsimyzuruku iwaze tu ustsá Sesus tuktsa awatsa mozurukunaha. Amy ty tsimykara siakparawy iwatsahi wasani mykaranaha niwatihi pasopykzukunaha.

¹³ Tsiplikperykyze abo mozumu papeu tsipiny. Papeu Deus harere my. Ana papeu humo iwatahaha tsipinykyze opykani tsimytsasoko iwaze hi Deus harere kytsa piwaby-naha. Asahi mozumubanahaze papeu humo iwatahaha tsipinyze. Deus harere tsimytsasoko. Sesus harere ty tysihyrinymyrykykta: ¹⁴ Jatuba tu Deus tazikwy ty abo nyny niy. Tarabaja humo tazikwy ty abo nyny niy. Deus sohokotsa ibo nitsasokonahaze iwa zuruze Deus tazikwy ty abo nyny niy. Sesus tuktsa nasispirikponahatsa tahatsyhyrypetsa ty aharek humo paik paik nikaranahaze, iwaze Deus tazikwy atuk nizapywy. Nasispirikponahatsa sopyk humo tahatsyhyrypetsa ty aharek humo paik paik nikaranaha. Iwa zuruze mytsatyzo tsimy. Iwa kytsa ahasopyk Deus hyrikoso humo nikaranaha. Abaka Deus zikwy atuk mynapykyryk.

¹⁵ Hawa motsasoko mytsatziu tsimy! Iwa tsimyzuruku zeka kytsa asoho tihi:

— O Sesus harere bo hyỹ mykara. Pykyhytu iharere bo hyỹ mykara — maha. Iwa asoho ty mykaranaha.

¹⁶ Ikia tu pykyhytuty tsimykara. Hawa tsimysi-hyrinomyry pykyhytu tsimy. Iwa tsimysihyrinomyryky. Wasani tsimyzeka tsamysapyrëta tsimozik. Kytsa asahi pawabykynaha simysapyrëtsa moziknaha. Iwa isopyk zeka ikia Deus tuk awahi tynapykyryk. Kytsa asahi pawabykynaha asa kino niwatihi Deus tuk tahawahi my-napykyryknaha hỹ.

5

Hawa Sesus tuktsa ty tsimaha.

¹ Maku iktsaikbata imysapybyita mykara zeka betsak betsakbyity. Ituk tsimypamykysoko zuba hawa imys-apybyita mykara ana humo hi tsimypamykysoko. Azo wata humo tsinakara nahawa tihi. Kytsa siypykyzytyktsa bo tsimypamykysokoze atukytsa babatsa humo tsinakara naha wa.

² Wytykyryk sistsaikbaza simysapybyiza mykaranaha zeka asiza bo tsimypamykysokoze ajeza humo tsinakara naha wa tihi.

Sipyitsabyiza bo tsimypamykysoko zeka atukykyry babaza humo tsinakara naha wa tihi. Wytykyryk tsimypamykysokoze batu mytsaty ziky:

— O uta piaksetsihikik — tsimy. Iwa batu mytsaty tsimy. Ba ziksimi.

³ Aba haramukukaka soho motsasoko. Hawa asiza tysitsumuëhĩnaha motsasoko. Haramukukaka babaza.

⁴ Haramukukaka sihyrytsa sispitu zeka iwatsahi taha-jeza bo mysisakihikynaha! Asahi tahajeza humo simy-pokzitsiukrëtsa. Atatsa istiokatsa kino ipokzitsitsitsa

moziknaha. Kytsa tatukytsa hi mysipokzitsikinaha wasani my. Deus niy:

— O kytsa tatukytsa humo mysipokzitsikinaha zeka wasani — niy: Tubabatu asahi tahahyrytsa nisipokzitsikinaha. Abaka sihyrytsa kino tahajeza mysipokzitsikinaha. Sihyrytsa tahajeza disahawy ty nyny mykaranaha. Isuk humo niwatihi ibo nyny mykaranaha!

⁵ Haramukukaka asiza zubaza atatsa Deus bo mopamykysoikik. Atatsa ustsya tsyhyryze Deus bo mopamykysoikik. Pibytuhukutu atatsa Deus bo myzapykyikik. Unata eze kino niwatihi atatsa Deus bo mopamykysoko. Atatsa Deus humo tispirikporētatsa. Kytsa atatsa bo disahawy ty nynyntaha! Atatsa bo isuk ty nynyntaha tsimaha.

⁶ Haramukukaka atatsa zuba mytsaty mykara zeka batu tytsumuēhī. Asiza hi nawakyriki naha zuba ana humo hi mytsaty mykaranaha. Asizahi sispituze niakbakanahatsa waza batu wasani mykaranaha. Niakbakanahatsa ustsya batu isty tsumuēhī asiza ustsya batu isty tsumuēhī iwazahi niakbakanahatsa waza. Mymysapybyikinaha. Iwatsahi batu isty tsumuēhī. ⁷ Amy abo motsasoko atsatu sibo tsimytsasoko. Haramukukaka situkytsa bo. Iwatsahi kytsa sizubarētsa sisoho hi:

— O asiza siza wasani mokurunaha — maha. ⁸ Katsaktsa mytukytsa isty pokzitsiu byizeka batu mysapy tsimaha. Iwa tsimykurunaha zeka katsa Sesus humo batu mospirikpo. Katsa Sesus taereke iwata mytukytsa mysopyk zeka. Kytsa Sesus humo batu sispirikpo asahi situkytsa mysipokzitsikinaha. Iwatsahi katsaktsa mytukytsa humo mypokzitsi byizeka katsa tu tsimysapybyikinaha.

⁹ Haramukukaka sizubarēza sinaro ty papeu humo batu tywataha. Sitsaikbaza zuba papeu humo tsiptiwatahaka, asizahi humo Sesus tuktsa mysipokzitsikinaha. Iwatsahi

sinaro ty papeu humo tsipiwatahaka. Sitsaibaza sesēta anos zuba papeu humo tsipiwatahaka. Atatsa ibarikta estuba zubata zeka papeu humo tsipiwatahaka. ¹⁰ Utsa kytsa sisoho mopamykysokonaha:

— O atatsa tsimysapyrētatsa. Nimysapywyky. Ihyrytsa kino iharere bo hyỹ mykaranaha. Batu pimyiki. Kytsa iwahoro zumunahaze atatsahi: “Pakutynty niy. Tsikadisaha my papyrytsapik” my iwa mykara. Sudeutsa sopyk ty kytsa mysipyrytsapikik. Zikbyituhukutu Deus tyryktsa mysitsumuēhīkī, asahi mozurukunahaze tsihokdahrēnaze atatsa kytsa mysitsumuēhī. Utsa kytsa tsyhyryze mymysapywyky — maha. Iwa mozuruku. Atatsa kino papeu humo tsipiwatahaka, atatsa haramukuka batatsa hỹ.

¹¹ Sitsaibabyiza tu niharamukukakanahaza papeu humo tywataha wataha byitaha. Asiza siza mekta maku tuk. Kiristu tsyhyryze batu tarabaja zikaha. Maku mektatu piakse mykaranaha bo mytsaty mykara. ¹² Atatsa hi nitsasoko zeka:

— O batu kazeky niy. Kiristu tsyhyryze zuba tarabaja mykara — niy. Bykyze maku atatsa ziaксеhyryk. Iwaze kytsa atatsa soho:

— Atatsa nitsasoko “Kiristu tsyhyryze zuba tarabaja my niy.” Aba maku atatsa ziaксеhyryk. Kiristu tsyhyryze batu tarabaja nikara maha. Taharere ty batu hỹ niy — maha. ¹³ Haramukukaka sistsaibabyiza mowakyririknaha zuba. Nipamykysoikiknaha zuba. Siharerewabymybarēza maha. Batu sipasaratsihik. Wahoro taba zuba paikpa mynapamykysoikiknaha. Imysapybara ty zuba mynatsasoikiknaha. ¹⁴ Iwazahi tahapytsazonaha maha. Sitsaibabyiza tu tahapytsazonaha zeka jokboha mytsaty mykaranaha. Tahabykyhynahaze. Tahabykyhytsa mysipupuruknahaze mysipokzitsinaha. Iwaze kytsa asahi

Sesus tuktsa batu siakparawy sisoho batu siharere-wabymybara. Mysukyrytsitsa haramukukaka soho batu siharerewabymybara. ¹⁵ Wastuhu haramukukaka botu Sesus harere bo batu h̃y niaha. Ibase zerekiknaha. Abaka Satanas harere bo yh̃y maha. Kaharere haramukuka soho tsipiwaby.

¹⁶ Iwaze wytykyryk Sesus tukykyryk iwa mozurukunaha. Atatsa itukytsa haramukuka zeka, atatsa kino haramukuka humo tsimypokzitsiarētatsa. Sesus tuktsa asahi mozumubanahaze atatsa humo batu ipokzitsi. Iwatsahi haramukukaka hi asizazubahaza mysipokzitsikinaha. Sesus tuktsa haramukukaka sibo zuba mysitsumuēh̃ik̃inaha. Iwazahi haramukukaka sinamybyikiza tysitsumuēh̃inaha.

¹⁷ — Mymyspirikpokotsa Sesus tuktsa tysitsumuēh̃iziukunahaktsa! kytsa. Ahanamy ty sibo nynytaahaktsa, ahadisahawy ty sibo nynytaahaktsa! Sesus tuktsa mysitsumuēh̃iziukunaha zeka nynytohitaha! Asahi Sesus harere ty mymyhyrinymyrykynaha zeka asa kino ahanamy ty sibo nynytohitaha. Siharere tsiwabyziukunaha — my. ¹⁸ Iwa ikiahatsa ahasopyk. Deus harere botu ziwatahaka. Moises Deus harere botu ziwatahaka:

— Ahararatsa ahatsyhyryze tarabaja mykaranaha zeka isty sakiwara sakiwara byitaha iwatsahi tadisahanaha. Ahararatsa ty pahatsumuēh̃inaha zeka mytadisahanaha — my. Usta papeu Deus harere tihi:

— Aty atsyhyryze pahatsumuēh̃ik̃i anamy ty ibo nynytykta! Wasani my. Iwatsahi nasispirikponahatsa Sesus tuktsa ahanamy ty sibo nynytaahaktsa. Sesus tuktsa sizubarētsa tahanamy ty nasispirikponahatsa bo nynytaahaktsa! — tsimaha.

¹⁹ — Estuba maku Sesus tuktsa myspirikpokotsa soho tsiharerewabymybarēta zeka ba ziwaby. Atahi:

“O myspirikpokotsa imysapybyita nikara” my. Ana kino ba ziwaby. Kytsa petoktsa myspirikpokotsa soho motsasokonaha zeka:

“O imysapybyita nikara” maha. Wabytahaktsa. Kytsa harakykbyihi myspirikpokotsa soho motsasokonaha zeka:

“O myspirikpokotsa imysapybyita nikara” maha. Asa kino wabyziutaha tsimy — my. ²⁰ Myspirikpokotsa Sesus tuktsa pisapybyi zeka myzubaha okzetu tsibetsakaknaha. Imysapy byizeka batu pykzeky iwaze kytsa sizubarēta okze tu tsibetsakik. Ibo tsipibetsak zeka usts a myspirikpokotsa sipybyrēta maha:

— O katsa kino niwatihi tabetsakiknaha — maha. Iwatsahi sipybyrēta. Imysapybyitsa mykaranaha humo sisikpybyrēta.

²¹ O Timoteo kaharere bo hȳ tykta! Ana hi papehaka atsa tyty tsimy. Deus kaharere piwabyky Sesus Kiristu niwatihi kaharere piwabyky. Bijoikpe iknyktsa asahi Deus nisiwatawyky kaharere piwabykynaha, sizubarēta kaharere piwabykynaha ape ikykara naha ty piwabykynaha. Iwatahi myspirikpokotsa atsawatu asopyk. Ba ziktsaso:

— O atakta maku kaharereziuwuy kapokzitsikitsa ihumo batu kasakpare. Usta maku imysapy byita zeka tsipibetsak! — my. ²² Maku myspirikpokotsa mozikze atsyhyrypetsy ty iharek humo paik tsimy. Iwa tsimy mysopyk ty zuba. Pykyhytuty. Iki ahyrizik watuty atsyhyrypetsy ty maku harek humo paik tsimy. Usts kytsa simysapybyitsa mykaranaha zeka ikia batu. Ba situk zikasapy. Atazuba mozik zeka bazimyi. Tsimysapyrēta tsimozik.

²³ O Timoteo pihik baba ty zuba ba tsō tsimy. Ahakuki tsapyri myzibytuhukutu iwatahi duabohotsa tsik tsipiku.

Myhakoki hwi waha duabohotsa tsik ty tsõ tsimyze iwaze ahakuki jokboha mozik.

²⁴ Wastuhu kytsa sizubarẽtsa okzeka pisapybyikinaha. Kytsa sizubarẽtsa simysapybyitsa nikaranaha ana soho humo sihyrinymyrẽtsa. Deus mysisininiwyky ana humo hi sihyrinymyrẽtsa. Utsa kytsa pisapybyikinahaze kytsa papatu mykaranaha iwaze kytsa simysapybyitsa mykaranaha soho humo batu sihyrinymyry. Aibani zuba kytsa simysapybyitsa nikaranaha soho humo sihyrinymyrẽtsa. ²⁵ Iwaze wastuhu kytsa sizubarẽtsa okzeka simysapyrẽtsa nikaranaha. Kytsa sizubarẽtsa amy tisapyrẽna maha ana soho humo sihyrinymyrẽtsa. Utsa kytsa simysapyrẽtsa mykaranahaze kytsa papatu mykaranaha. Tisapyrẽna hi piokpitsikĩnaha. Abaka batu aty tohi hawa simysapyrẽtsa mykaranaha sihyrinymyrẽtsa. Aibani zuba kytsa hawa tisapyrẽna nikaranaha ana soho humo sihyrinymyrẽtsa hỹ.

6

¹ Sesus tuktsa asahi mysitsumuẽhikĩnaha okyrysaro perykytsa batu sibo nyny ziky. Iwatsa tu nisitsumuẽhikĩnaha zuba. Asahi maku sitsihitsa wasani sisopyk maha iwa sihumo tsimy. Iwa ihumo sisopyk zeka kytsa Sesus humo batu sispirikpo.

— O Deus harere bo wasani my — mykaranaha, ahahumo Deus harere bo wasani my mykaranaha. Myhyrinymyrywy batu amy tohi siharerewabymybara maha. Iwa sihumo tsimy. ² Wastuhu Sesus tuktsa tahatukytsa humo nisitsumuẽhikĩnaha. Utsa Sesus tuktsa sihumo sitsihitsa niyziknaha. Iwatsahi batu tyso:

— O atakta Sesus tukta niwatihi. Iwatahi iharere bo batu hỹ — my. Iwa batu tyso. Ikia ispe tsimy:

— Asa bo hi tsysitsumuëhĩnahaktsa Sesus tukta niwathi iwatatu tsitsumuëhĩnaha. Ata maku Sesus humo tsimypokzitsiarëta iwatsahi tsitsumuëhĩnaha — tsimy. Timoteo ana humo hi tsihyrinomyryky. Sesus tuktsa tsihyrinomyryky:

— Tsisapybakanahaktsa! tsimy. Iwa tsimyzurukunaha tsimy. Sesus humo tsimypokzitsiarëta iwatahi tystsumuëhĩnahaktsa! — tsimy.

Iwa tsimyzurukunaha.

Sesus spirikpowy tsihyrinomyrykta.

³ Sesus Kiristu mypehakatsa iharere wasani my. Aty iharere bo hyĩ my zeka Deus hi:

— O atakta tsimysapyrëta — my. Aty tohi meky watu mysihyrinomyryky zeka Sesus harere humo batu ihyrinomyry. Iharere batu iakparawy.

⁴ — Katsa zuba myhyrinomyrëtsa tsimaha — maha. Mahani ba. Sihyrinomyrybyitsa tu sisopyk. Myhara-pepehakanaha zuba. Sizokdirëtsa. Mopamykysoikiknaha zuba. Siharerewabymybarëtsa maha. Utsa kytsa soho humo myharape ziubyikinaha. Iwazeka simytsatyharëtsa moziknaha. ⁵ Kytsa tuk mopamykysoikiknaha zuba. Sesus Kiristu harere batu siakparawy. Iharere pimiyikinaha. Iwa mytsaty mykaranaha.

— Katsa Deus humo tsimyspirikponaha zeka mynamyrëtsa tsimoziknaha — mytsaty ahabyitsa zikaha. Iwa tahape tu sisopyk mybarapetu mykaranaha. ⁶ Sesus tukta tsinamyreëta wata. Deus humo tsinamyreëta wata. Mynamyreëtsa zeka mydikrëtsa. Mynamy tsikaeni zikino mydikrëtsa. Deus mytuk mynapykyk iwatsahi mykurëtsa. Takino tsimysapyrëta hỹ. ⁷ Katsa tsikpupuruknahaze batu mynamykyryk. Iwa tsimyhyrikosokdanahaze batu amy tohi ty mytuk wabehyryk zikaha. Katsa zuba Sesus

mymyoktyhyryk. ⁸ Iwatsahi mykurêtsa. Katsa mydisahawy mysuk iwaha humo mykurêtsa. ⁹ Kytsa tihi:

— O kanamy tsizubarêna zeka kakparawy, okyrysarowaka kino niwatihi kakparawy. Kanamyrêta mozik hỹ — my. Asahi okyryсарo mysisapybyikinaha. Amo batu sapy my okyryсарo soho humo mykaranaha. Asahi siraratsa watsa maha. Sirara tsaraparêta zeka tawerykywy bo mynatsuk. Anaeze mora. Iwa maku tahi:

— O uta kanamyrêta hỹ — my ta kino okyryсарo humo amy ty imysapybyitsa mykara. Bykyze tisukatsihikrêta mozik. Sinini ykarawy bo ba zikzoizo. Hawa siraratsa tawerykywy bo ba zikzoik atahi sinini ykarawy eze ba zikzoik. Deus tuk ba ziktasapy. ¹⁰ Asahi okyryсарo humo simysapybyitsa mykaranaha. Asahi okyryсарo siakparawy iwatsahi Sesus humo batu sispirikpo. Sesus soho humo nispiriktsokdanaha. Okyryсарo tsizubarêna ziaksenaha. Sisukatsihikrêtsa nikaranaha. Sispirikpobyitsa tu sisukatsihikrêtsa nikaranaha.

Abaka Timoteo ikia bo zuba motsasoko.

¹¹ O Timoteo ikia hi Sesus tukta babata tsimy. Iwatahi amo imysapybara humo tsimoewykta! Wasani tsimyzuruku. Deus harere bo hyỹ tsimykara. Deus humo tispirikpoziurêta. Utsa kytsa tysipokzitsikikta. Kytsa humo batu apyby. Sinini tsimykara zeka tsapunihikrêta tsimozik. Batu tyso!

— O uta zuba myhyrizikwanita — iwa batu tyso. Utsa kytsa harere bo wabyziuty. ¹² Timoteo Sesus humo tispirikpoziurêta tsimykta! Kytsa asahi motururukinahatsa watsa. Sipaikrêtsa moziknaha. Ikia siwata tsimozik. Ikia Deus bo zuba mytsaty tsimykara hawa kytsa motururuknaha iwaze aty tapara pomo tawata. Ikia hi Sesus humo tsaspirikporêta babata iwatahi tsapunihikrêta tsimozik. Sesus humo tsaspirikporêta hỹ.

Tsimyhyrikosokda zeka Deus tuk awahi tsimynapykyryk. Ikia kytsa sizubarëtsa okze botu nitsasoko:

— O utakta Sesus harere humo mospirikpoko — tsiky. Iwa kytsa okze tsiktsasoko. Iwaze Deus zawatawy. ¹³⁻¹⁴ Sesus Kiristu harere bo hyÿ tsimykta! Iwaze batu amysapybyita tsimykara. Sesus asoho humo batu amysapy ziky. Sesus harere humo zuba tsimyzuruku, mekywaha myharere bo ka ba yhÿ tsimy. Sesus Kiristu myziksize mymyoktyhyryk. Atahi tsipperykyze wasani tsimyzuruku. Ana hi motsasoko, Deus okze tu abo motsasoko. Sesus Kiristu okze tu niwatihi abo motsasoko. Deus kino kytsa abazubatsa ihumo sispitu. Siraratsa sisarakatsa kino niwatihi ihumo sispitu. Sipehakatsa niwatihi ihumo sispitu. Iwaze Sesus Kiristu tsipunihkrëta batu ipyby. Sipehatsa Pötios Piratus iokeryk tu amy ty wasani my atsatu nikara. Batu ipokso ipybybyita ziknakara wasapeha ty zuba nikara.

¹⁵ Deus mozihikik zeka Sesus mybo myzipeha iwa mybo myziksizo. Deus tsimysapyrëta mykara. Atahi zuba abazubata. Utsa pehatsa iharere bo hyÿ mykaranaha. Ata pehatsa kino myhyrizikwani my. Deus zuba mytsihitsa kytsa sizubarëtsa humo sitsihitsa my.

¹⁶ Katsa tsimyhyrikosokdanaha. Deus koikny baktatu. Tawahi mynapykyryk. Amy skaraba tisapyrëna ihumo zuba tisapyrëna. Isapy haramwe jekwaha humo tisapyrëna. Haramwe bo iktsa tsimy zeka batu isapy iwa zeka ihumo tisapyrëna zuba motare. Iwaze katsaktsa ituk ahabyi zeka hawa haramwe bo batu iktsa tsimaha katsa mymysapybyiri humo ba ibo iktsa tsimaha. Katsa batu ibo iktsa zikaha. Mysapybyitsa tsimykaranaha zeka ba ituk tsimynapykyryknaha. Katsaktsa iharere bo hyÿ tsimahaze mekywatsa tu tsimoziknaha. Ihumo ahamys-

apyrëtsa tsimoziknaha iwatsahi iharere bo hyÿ tsimahaktsa kytsa! tsimaha. Iwatsahi katsa tihi:

— O Deus ikia zuba wasani tsimykara. Ikia zuba tsamysapyrëta. Myhyrizikwanita awahi tsimynapykyryk. Azikwy kino niwatihi atuk awahi mynapykyryk — tsimaha. Iwa ibo tsimypamykysokonahaktsa kytsa.

¹⁷ Timoteo Sesus tuktsa asahi sinamynikitsa pe tsimy:

— O sinamynikitsa batu tyso “O katsa zuba myhyrizikwanitsa tsimaha.” Ahanamy byizeka sa hawa tsimaha Ahanamy humo tsikaeni zuba ahakparawy zeka. Deus humo tuspirikpokonahaktsa! Atahi mynamykusukniki. Amo wasani my anaty hi mybo nyny my — tsimy.

Iwa sibo tsimy:

¹⁸ — Utsa kytsa tysipokzitsikinahaktsa. Sibo tsisapybanahaktsa! Ahanamy utsa bo tsibiakaknahaktsa! Iwa sinamynikitsa bo tsimypamykyso. ¹⁹ Ahanamy ty nyny tsimaha zeka, usa ahanamy ka Deus baze tu mynapykyryk. Ahanamy mekywaha tu Deus baze tu maha, anaeze tawahi ahanamy mynapykyk. Iwaze ikiahatsa Deus tuk ahawahi tsimynapykyryknaha hÿ — tsimy.

Iwa Timoteo ikia sinamynikitsa bo tsimytsaso.

Aba nepyk.

²⁰ — O Timoteo Deus harere bo hyÿ tsimykarakta! Pykyhytuty iharere bo hyÿ tsimykta! — my. Kytsa asahi Deus harere humo batu siakparawy sibo batu motsaso. Tsikaeni zuba sibo tsimypamykysoko. Siharerewabymybarëtsa maha. Asa hi:

— Katsa zuba myhyrinymyrëtsa — mybarapetu mykaranaha. Situk ba zikmysapynaha. ²¹ Kytsa siharere piwabykynahaze sibo yhÿ mykaranaha. Iwatsahi Sesus humo batu sispirikpo. Sesus zerekiknaha siharere humo. Iwa my.

1 Timoteo 6:21

25

1 Timoteo 6:21

Deus pahasapywyky.

Aba ikia pe Deus kino ahumo tsimypokzitsiarēta Sesus tuktsa sihumo mysipokzitsihiki niwatihi. De.

Pauro

Deus Harere Aibaky Sesus mymyspirikpoko naha New Testament in Rikbaktsa (BR:rkb:Rikbaktsa)

copyright © 2011 Wycliffe Bible Translators, Inc.

Language: Rikbaktsa

Translation by: Wycliffe Bible Translators, Inc.

Rikbaktsa [rkb], Brazil

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Rikbaktsa

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

